



**Klan Kosova  
Baton Haxhiu  
Drejtor  
Prishtinë**

**Rasti Nr. 2019/24  
Ref:1905/615/KPM/mf**

### VENDIM

**Lidhur me Rastin Nr. 2019/24-Komisioni i Pavarur i Mediave (KPM) për Klan Kosova (Palë përgjegjëse)**

---

#### Faktet

1. Komisioni i Pavarur i Mediave (KPM) ka miratuar Kodin e Etikës KKPM-2016/03 për Ofruesit e Shërbimeve Mediale në Republikën e Kosovë, i cili ka hyrë në fuqi më 11 tetor 2016. Me Kodin e Etikës KKPM-2016/03 janë përcaktuar rregullat e sjelljes dhe të punës së shërbimeve mediale audiovizuale në pajtim me dispozitat ligjore që janë të domosdoshme në një shoqëri demokratike.
2. KPM me datë 17 prill 2019 ka pranuar një ankesë nga znj. Mirvete Spahija, të parashtruar nga avokati i saj z. Samir Rekaj, ndaj kronikës “*Babai ther me thikë të birin*”, të transmetuar nga pala përgjegjëse me datën 8 prill 2019 në edicionin e lajmeve qendrore të orës 20:00.
3. KPM me datën 17 prill 2019 përmes një shkrese e ka njoftuar Palën përgjegjëse lidhur me ankesën e pranuar nga Pala ankuese dhe ka kërkuar që brenda tre (3) ditësh të sjellë sqarim lidhur me pretendimet e ankesës.
4. KPM me datën 25 prill 2019 ka pranuar një përgjigje nga Pala përgjegjëse përmes së cilës theksohet se znj. Mirvete Spahija ka pranuar të flasë për televizionin e Palës përgjegjëse me kusht që të mos i zbulohet fytyra dhe identiteti. Gjatë gjithë kronikës fytyra e saj është mbajtur e fshehur, është prezantuar vetëm me iniale dhe ajo është pyetur edhe për filmimin brenda shtëpisë.
5. KPM me qëllim të vlerësimit të ankesës së Palës ankuese ka bërë monitorimin e kronikës së transmetuar në Palën përgjegjëse dhe ka analizuar përgjigjen e Palës përgjegjëse në lidhje me pretendimet ankimore të Palës ankuese. KPM bazuar në Raportin e monitorimit

ka gjetur se gjatë kësaj kronike është bërë e ditur për publikun se ngjarja ka ndodhur në Dardanë të Ferizajit, se në shtëpi ishte vetëm nëna e djalit N.S., e cila edhe është intervistuar e shtrirë në krevat.

6. KPM pas të gjeturave nga Raporti i monitorimit, me datën 26 prill 2019 i ka dërguar Palës përgjegjëse Njoftim për Shkelje me të cilin e ka njoftuar për shkeljet e bëra dhe i ka kërkuar të veprojë në pajtim me Kodin e Etikës KKPM-2016/03, duke i ofruar mundësinë që brenda afatit prej tre (3) ditësh të ofrojë sqarimet për shkeljet e gjetura.
7. KPM me datën 10 maj 2019 ka pranuar një përgjigje të dytë nga Pala përgjegjëse përmes së cilës theksohet edhe një herë se znj. Mirvete Spahija ka pranuar të flasë për televizionin e Palës përgjegjëse për ta intervistuar, me kusht që të mos i zbulohet fytyra dhe identiteti. Gjatë gjithë kronikës fytyra e saj është mbajtur e fshehur, është prezantuar vetëm me iniciale dhe ajo është pyetur edhe për filmimin brenda shtëpisë.

### Analiza Ligjore

8. Komisioni bazuar në të gjitha faktet dhe analizat e lartpërmendura konstaton se Pala përgjegjëse është gjetur në shkelje të nenit 7, paragrafi 1 dhe 8 të Kodit të Etikës për Ofruesit e Shërbimeve Mediale në Republikën e Kosovës KKPM 2016/03.
9. Bazuar në monitorimin që i është bërë kronikës së transmetuar me titull *“Babai ther me thikë të birin”*, është gjetur se Pala përgjegjëse ka vepruar në kundërshtim me nenin 7, paragrafi 1, të Kodit të Etikës KKPM-2016/03, i cili përcakton se:

*“E drejta e privatësisë së individëve duhet të respektohet. Ndërhyrja në çështjet thjeshtë private apo personale të cilat nuk kanë ndikim në interesin publik është e ndaluar. Ata që janë prekur nga tragjedia apo pikëllimi duhet të trajtohen me ndjeshmëri, respekt dhe maturi duke e respektuar privatësinë e plotë të tyre.”*

KPM ka gjetur se Pala përgjegjëse ka raportuar të nesërmen për ngjarjen e rëndë të ndodhur në familjen e Palës ankuese, duke e incizuar gruan e sëmurë e të moshuar, të shtrirë në krevat, e cila sapo kishte përjetuar një ngjarje të rëndë, pa respekt dhe maturi se si do të ndikojë ajo intervistë në gjendjen shëndetësore dhe marrëdhëniet familjare të mëtutjeshme të saj.

10. Bazuar në Raportin e monitorimit KPM gjithashtu ka gjetur se Pala përgjegjëse ka vepruar edhe në kundërshtim me nenin 7, paragrafi 8, të Kodit të Etikës KKPM-2016/03, i cili përcakton se:

*“Rrëfimet për tragjeditë personale duhet të paraqiten me kujdes dhe mirëkuptim nga ana e OSHM-ve.”*

KPM ka gjetur gjithashtu se Pala përgjegjëse ka dështuar të sigurojë trajtim me kujdes dhe mirëkuptim gjatë transmetimit të kronikës rreth Palës ankuese, e cila sapo kishte përjetuar tragjedi familjare.

